

四庫全書

子部

欽定四庫全書

名賢氏族言行類稿卷二

宋 章定 撰

封七

姓纂曰姜姓炎帝之後封鉅為黃帝師胙土命氏夏
封父侯國君也今封丘是也後漢有侍中封岌渤海
脩縣封岌五代孫仁孫釋晉侍中生性悛

晉載記封孚字處道祖悛振威將軍父放慕容暉之世

吏部尚書孚幼而聰敏和裕有士君子之稱慕容德
曰朕平青州不以為慶喜於得卿也 外總機事內
參密謀雖位任崇重謙虛博納甚有大臣之體 後
為太尉

南史孝義封延伯字仲連三世同財為北州所宗附
為梁郡太守有高士風

北史封懿字處德有才器能屬文仕慕容寶位戶部尚
書歸魏拜都坐大官

封回字叔念明帝時為瀛州刺史乘寇亂水潦之後表
求賑恤免其租調州內賴之 後為殿中尚書 子
隆之字祖裔寬和有度量歷事五帝以謹素見知四
為治中再為吏部尚書一為僕射四為冀州刺史每
臨冀部州中舊齒咸曰我封公復來其得物情如此

子繪字仲藻為平陽太守 隆之弟興之字祖胄
位瀛冀二州刺史所歷有當官譽 子孝琬字士蒨
性恬靜頗好文詠位東宮洗馬 孝琰字士光修飭

學尚有風儀位秘書丞以風流自立威儀閑雅容止
進退人皆慕之後兼尚書右丞其所彈射多承意旨
延之字祖業少明辨有世用位青州刺史

封琳字彥寶位中書侍郎 議定律令識者稱之

封肅字元邕博涉經史性恭儉不妄交游位尚書郎中
封軌字廣度通覽經傳與武邑孫惠蔚友善惠蔚每推
軌曰封生之於經義吾所不如者多矣後兼散騎常
侍銜命高麗高麗王雲不親受詔軌正色詰之雲乃

北面受旨使還轉考功郎中 郭祚常曰封軌幹國

之才必應遠至 軌以務德慎言修身之本姦回讒

佞世之巨害乃為務德慎言遠佞防姦四戒 子偉

伯字君良博學有才思弱冠除太學博士每朝廷大

議偉伯參焉

封述字君義齊初遷大理卿歷度支五兵殿中三尚書

久為法官明解律令議斷平允深為時人所稱

弟詢字景文以清素自持位尚書左丞濟南太守歷

官皆有幹局才具臨郡甚著聲績

封敕文代人也後領護西夷校尉秦益二州刺史

唐封倫字德彛年方少舅盧思道曰是兒識畧過人當

自致卿相 楊素與論天下事袞袞不倦薦之帝擢

內史舍人

封常清蒲州人夫蒙靈譽為四鎮節度使從戰有勞擢

北庭都護性勤儉耐勞苦賞罰分明

封敖字碩夫進士第雅為李德裕所器會昌初為翰林

學士屬辭贍敏不為奇澁語切而理勝武宗使作詔
書慰邊將傷夷者曰傷居爾體痛在朕躬帝賜以宮
錦 劉稹平德裕以定策功進太尉時草制云云謂
教曰如君此等語豈易得耶解所賜玉帶贈之

龔八

姓纂曰左傳晉大夫龔堅

前漢兩龔皆楚人勝字君賓舍字君倩二人相友並著
名節世謂之楚兩龔 勝三舉孝廉舉茂才為重泉

令哀帝徵為諫議大夫遷左丞相司直徙光祿大夫
守右扶風王莽秉政後歸老於鄉里王莽遣使拜為
講學祭酒 不應徵不飲食而死門人哀經治喪者
百數有老父來弔曰薰以香自燒膏以名自銷龔生
竟天年非吾徒也後世刻石表其里門 舍以勝
薦徵為諫大夫病免復徵為博士又病去頃之哀帝
遣使拜為太山太守既至數月上書乞骸骨 舍亦
通五經以魯詩教授 舍勝既歸鄉里郡二千石長

吏初到官皆至其家如師弟子之禮 揚子問明篇
楚兩龔之潔其清矣乎

龔遂字少卿山陽南平陽人也宣帝時渤海饑盜賊起
以遂為渤海太守時年七十餘單車至府郡中翕然
盜賊皆罷乃躬率以儉約勸民務農桑使民賣劍買
牛賣刀買犢數年遣使徵遂以年老不任公卿拜為

水衡都尉所居民富所去見思

循吏
敘

晉隱逸龔壯字子瑋潔已自守惟研考經典覃思文章

龔玄之字道玄好學潛默安於陋巷徵為國子博士苦

辭

南史儒林龔孟舒通毛詩善談名理仕梁位尋陽郡丞
孝義龔穎遂寧人也

龔祈字盖道風姿端雅容止可觀范曄見之歎曰此荆
楚之仙人也

宋朝龔夬字彥和瀛州人出舉進士為太僕寺主簿遷
監察御史建言元豐中察官各無言事乞令監察御

史兼掌論議益廣言路徽宗立召為殿中侍御史言
修五朝寶訓乞令不可增損變亂事實以濟姦說時
議避之

龔原字深之處州遂昌人也舉進士以秘閣校理出為
兩浙轉運判官紹聖初召為國子司業遷秘書少監
改起居舍人權中書舍人以集賢殿修撰知潤州徽
宗即位入為秘書監兼侍講遷給事中初哲宗崩大
臣引開寶故事謂上當服齊衰期原上疏言三年之

喪自天子至於庶人一也出知南康軍改壽州揚州
召為工部侍郎移兵部除寶文閣待制知廬州始
原力學以經術尊敬王安石始終不易也

龔茂良字實之莆人也舉進士歷溫陵幕樞密黃祖舜
聞其賢力薦諸朝召試除秘書省正字隆興間擢右
正言論事改太常少卿繼除憲廣東知廣州移江西
漕知隆興召除禮侍遷禮書除參知政事留正鄭僑
謝諤周嗣武楊萬里曾喚皆為帥日極力稱薦之世

推其知人晏最堪墳皆其子孫而夢良遂良史良友
良日嚴日草皆相繼登科亦皆其羣從也

見莆陽
人物志

洪九

姓纂曰共工氏之後本姓共氏因避仇改為洪又曰
毗陵監察御史洪察常州人本姓弘氏避孝敬諱改
姓洪氏生子與起居舍人生經綸諫議大夫通鑑唐
德宗建中元年二月命洪經綸為河北黜陟使

宋朝豫章洪氏山谷四甥皆以文詞知名 朋字龜父

同郡黃著集龜父詩百篇為一集山谷以謂句句可
傳也 芻字駒父殫洽開豁溢於文詞中進士第放
浪江湖不求聞達嘗倅上饒累任奉祠靖康初召為
郎擢諫大夫遭值變故坐事貶海上平生為詩千餘
篇著老圃前後集 炎字玉父登第元祐之末試吏
紹聖之初顯於宣和貴於紹興自直史局編修官擢
著作郎秘書少監當王黼蔡攸用事之際始藉其文
以為寵終惡其學以為異罷歸江南上之六年宰相

薦之復為外監封上曰臣中年頗病於聽老而益增
然世人皆聾於心臣獨聾於耳心則了了惟上所使
上笑而禮之拜中書舍人病不能朝除待制徽猷閣
奉祠以便其歸 羽字鴻父元符之末上書入籍遂
終其身兵火之後詩文無傳焉朝廷官其一子見曾
慥百家詩選

洪丞相适狀其先君行實曰先君諱皓饒州人士良之
後登政和五年進士第建炎三年五月擢徽猷閣待

制禮部尚書使金留太原至雲中尼雅滿流遞之冷山
幾二十年還朝積官朝請大夫職徽猷閣直學士卒
諡忠宣 子适丞相遵樞密邁尚書事具國史

鍾十

姓纂曰宋微子之後桓公曾孫伯宗仕晉生州犁仕
楚食采鍾離因氏焉子孫或單姓鍾氏楚有鍾儀鍾
建鍾子期與伯牙為友項羽將鍾離昧昧中子接單
姓鍾氏潁川鍾接始居潁川長社

左傳定公五年楚王將嫁季芊以妻鍾建以為樂尹

鍾儀楚鄖大夫也 楚囚君子也言稱先職

後漢儒林鍾興字次文汝南人受嚴氏春秋光武召拜

左中郎將 詔令定春秋章句去其重復以授王太

子

鍾皓字季明潁川人少以篤行稱 避隱密山前後九

辟公府皆不就為士大夫所歸慕李膺歎曰鍾君至

德可師 兄子覲好學慕古有退讓風辟州府未嘗

屈志

皓孫建為司隸校尉 及皓終諸儒頌之曰材慮懿德
非禮不處悅此詩書弦琴樂古五就州招九膺台輔
逡巡主命卒歲容與

魏志鍾繇字元常為大理遷相國 文帝賜繇五熟釜
銘曰於赫有魏作漢藩輔厥相惟鍾實幹心膂靖共
夙夜匪遑安處百寮師師楷茲度矩 後遷太尉
子毓字稚叔十四為散騎侍郎機捷談笑有父風

累遷御史中丞侍中廷尉 都督荊州

鍾會字士季絲之子為鎮西將軍都督關中 平巴蜀

降姜維

晉書鍾雅字彥胃舉四行除汝陽令入為佐著作郎

遷御史中丞直去繩違百寮皆憚之 遭蘇峻之難

而雅匪石為心寒松比操

王渾妻鍾氏字琰數歲能屬文博覽記籍 禮儀法度

為中表所則

南史文學鍾嶸字仲偉好學有思理明周易 兩為記

室專掌文翰 兄岏字長丘為建康令 弟嶼字季

望永嘉郡丞

唐鍾傳為鎮南節度使 廣明後州縣不鄉貢惟傳歲

薦士行鄉飲酒禮率官屬臨觀故士皆不遠千里走

傳府少射獵醉遇虎與鬪虎搏其肩而傳持虎不置

會人斬虎然後免既貴悔之戒諸子曰士處世尚智

與謀勿效吾暴虎也

龍十一

姓纂曰尚書舜臣龍為納言子孫以王父字為氏又董父已姓賜氏豢龍氏龍且楚人為項羽將急就章龍未央亦楚人也

孟子龍子曰治地莫善於助莫不善於貢又曰不知足而為屨我知其不為蕢也

後漢龍伯高名述京兆人為山都長 馬援嘗戒其兄子曰龍伯高敦厚周慎口無擇言謙約節儉廉公有

威吾愛之重之願汝曹効之効伯高不得猶為謹勅之士所謂刻鵠不成尚類鶩者也光武由是擢拜零陵太守見馬援傳

五代龍敏字欲訥幽州永清人少仕州攝參軍劉守光亂敏避之滄州遂客於梁久不調敏素善馮道監軍張承業辟敏監軍巡官使掌奏記莊宗即位召拜司門員外郎為興唐尹事祖父以孝聞累拜吏部侍郎歷晉為太常卿使於吳越是時使吳越者見吳

越王皆下拜敏獨揖之遷工部侍郎

終十二

姓纂曰陸終之後以王父字為氏

前漢終軍字子雲濟南人年十八遷為博士弟子太守
聞其異材甚竒之與交結軍揖太守而去至長安上
書武帝異其文拜為謁者 上白麟竒木之對 入
關棄繻請受長纓羈南越王 年二十餘世謂之終
童

宮 十三

姓纂曰虞大夫宮之奇之後唐殿中侍御史宮志暉
居河東今河東有宮氏大厯兼侍御史宮頊或云恒
州人

左傳晉荀息請假道於虞以伐虢公曰宮之奇存焉

劉向新序曰晉獻公假道於虞以伐虢宮之奇諫曰
唇亡則齒寒今日亡虢明日亡虞可謂忠臣之謀也
家語孔子曰獨居思仁公言言義一日三復白圭之玷

是宮緇之行也

豐

十四

姓纂曰左傳鄭穆公子豐之後以王父字為氏有豐施豐卷魯有豐點宋有豐衍

宋朝豐稷字相之明州鄞縣人也舉進士為穀城令稍擢監察御史裏行言王安禮不可知制誥及安禮遷翰林學士復力言之除著作佐郎遷吏部員外郎提點利州路刑獄哲宗即位徙成都府路召為工部員

外郎遷殿中侍御史右司諫改國子司業起居舍人
太常少卿國子祭酒兼侍講拜刑部侍郎時苦雨雪
稷上疏曰自二聖臨御以來朝廷清明何嘉禾未臻
而沴氣期應豈應天之實未至事天之禮未備畏天
之誠未孚與豈宮掖之臣有關預政事者與天道聰
明苟無其事變不虛生願陛下昭聖德畏天戒延問
名臣總正萬事任賢責成而不受浸潤之譖惠民以
實而不尚姑息之政言如春陽動如祥風六親和於

內百官和於朝萬民和於下則天地和應而災沴消
矣以集賢院學士知潁州移江寧府召為吏部侍郎
出知河南歷真定潁昌應天府湖州杭州徽宗即位
以左諫議大夫召道除御史中丞稷對首論蔡京之
罪京貶又論章惇誤國惇黜又言宣仁佐佑哲宗垂
簾聽政退黜小人洎小人復用遂造誣謗今宜辨明
又史官修神宗實錄輒以王安石日錄亂之今修
哲宗實錄願擇史臣申飭成書又數上疏言近習之

非會曾布由內侍進將拜相稷謂臺屬曰盍共論之
遷工部尚書布遂相徙禮部以樞密直學士知蘇州
改越州蔡京相改寶文閣待制俄奪職知常州貶海
州團練副使睦州安置移道州別駕台州居住又除
移建州徙婺州提舉明道宮卒

蒙十五

姓纂曰風俗通東蒙主以蒙山為氏

史記蒙恬齊人也大父蒙騫事秦昭王官至上卿後為

秦將驚子曰武武子曰恬恬弟曰毅恬嘗書獄典文
學因家世得為秦將攻齊大破之拜為內史 恬威
振匈奴始皇甚尊寵蒙氏信任賢之而親近蒙毅位
至上卿出則駟乘入則御前恬外任事而毅常為內
謀名為忠信故雖諸將相莫敢與之爭焉

東 十六

舜七友東不訾之後

桐 十七

神仙傳桐君為廬著藥錄白日昇仙

僮十八

老僮之後或為僮氏山陽後漢有吳郡太守僮和

弓十九

魯大夫叔弓之後以王父字為氏漢有光祿勳弓祉也

太原弓祉之後後魏有博陵太守弓翊曾孫逸唐陳

倉令生義之達之義之德州刺史離石公生志和志

弘志元彭祖 志弘陳州刺史生嗣宗祠部員外郎

嗣業洛州司馬 志元右金吾將軍相州刺史陽曲

公 彭祖楊府長史蒲州刺史晉陽公生嗣初嗣說

嗣初雍州司功

躬 二十

何承天姓苑云人姓

融 二十一

世本云祝融之後

彤 二十二

本姓彤氏彤伯之後因避仇改姓彤今道士

中 二十三

何承天纂要云漢少府中京

雄 二十四

舜七友雄陶之後 廣陵今揚州有雄氏

戎 二十五

齊人戎夷之後蓋戎子駒支之胤漢功臣有柳丘侯戎
賜宣帝戎婕妤好生中山哀王竟 扶風虔州刺史戎

昱岐州人

莪 二十六

見姓苑春秋莪律 河南後魏書官氏志莪眷氏改
為莪

蟲 二十七

漢功臣曲成侯蟲進

充 二十八

急就章漢有充申仙人充尚之後見洞傳

通二十九

巴大夫食采通州因氏焉

紅三十

楚元王交子紅侯劉富之後

鴻三十一

大鴻之後左傳衛有鴻聊旆

公三十二

左傳魯昭公子衍公為之後漢主爵都尉公儉

功 三十三

風俗通云晉大司功景子之後

風 三十四

伏羲氏風姓之後風后黃帝輔臣

風 三十五

古風字纂要文云人姓

嵩 三十六

史記有嵩極玄子

鄴 三十七

周文王第十七子鄴侯之後以國為姓左傳鄴舒有二
雋才

崇 三十八

夏殷時侯國也崇侯彪為文王所滅

冬 三十九

前燕錄慕容晃左司馬冬壽

恭 四十

殷末侯國周文王侵阮徂恭見之毛詩

共 四十一

共工氏之後或云鄭共叔段之後今河內共城是其地
左傳鄭有共仲魯有共劉

彤 四十二

尚書彤伯周同姓為成王宗伯

佟 四十三

遼西北燕有佟萬以文章知名

雍 四十四

風俗通云周文王第十二子也雍伯之後以國為姓今
或音雍州之雍鄭大夫有雍糾楚有雍子齊有雍廩
宋有雍鉏漢什邡侯雍齒沛人也

從 四十五

從東莞從音七松反漢將軍從公

松 四十六

見姓苑

翁 四十七

漢有翁伯販脂而傾縣邑

唐翁承贊字文饒莆田人父巨隅嘗為滎陽府參軍承

贊乾寧間登進士第繼擢宏詞 天祐初以右拾遺

受詔冊王審知為琅琊王尋為右諫議大夫福建鹽

鐵使後除門下侍郎同中書門下事於使閩時建陽

別舊識僧亞齊詩云瀟瀟風雨建陽溪溪畔維舟見

亞齊一軸新詩劍潭北十年舊識華山西吟魂惜向

江村老空性元知世路迷應笑乘輶青瑣客此時無
暇聽猿啼 又詠槐詩云雨中妝點望中黃勾引蟬
聲送夕陽憶得當年隨計吏馬蹄終日為君忙

宋朝翁彥國字端朝建之崇安人也舉進士宣和初自六
路發運召除戶侍擢御史中丞以徽猷閣直學士知杭
州 子蒙之以門廕入仕為衢之西安尉士夫稱其
能復召對改秩終太府寺丞

翁績字德功崇安人也該博能文躬踐履之學士負笈

從之遊者以百數誨之無倦率多成就建炎三年虜
由馬家渡入建康統軍王瓊擁兵先遁以尋駕為名
突經縣境縣官民庶疑其剽劫生事皆竄匿山間績
獨毅然迎瓊諭以逆順邑賴以安尋盜發建陽績糾
義甲擒斬殆盡廟堂錄功狀命之以官歷惠黃二州
推幕繼宰桂陽之臨武以卒孫華字至實登乙未進

士第

容

四十八

帝王紀黃帝臣容成造歷舜舉八凱有仲容或云其後以王父字為氏何承天姓苑云禮記容居吳人也

庸

四十九

庸蜀殷時侯國周武王時來助伐紂子孫以國為氏漢有庸光又有膠東庸生

重

五十一

風俗通顓頊重黎之後少昊時南正重司天

名賢氏族言行類稿卷二

欽定四庫全書

子部

名賢氏族言行類稿卷

三五

詳校官典籍臣潘奕雋

主事臣祁韻士覆勘

總校官進士臣朱 銓

校對官中書臣張 曾炳

騰錄監生臣劉為幹

欽定四庫全書

名賢氏族言行類稿卷三

宋章定撰

江五十一

姓纂云嬴姓顓頊玄孫伯益之後爵封於江後為楚所滅以國為氏

史記儒林瑕丘江生為穀梁春秋

前漢江充字次倩趙國邯鄲人也為人魁岸容貌甚壯

武帝異之曰燕趙固多奇士 拜為直指繡衣使者
督三輔盜賊禁察踰侈貴戚近臣多奢僭充皆舉劾
奏請没入車馬

後漢江革字次翁事母孝鄉里稱曰江巨孝 舉孝廉復
舉賢良方正轉諫議大夫詔縣以穀千斛賜之巨孝
之稱行於天下

晉江統字應元靜默有遠志時語曰嶷然稀言江應元
轉太子洗馬在東宮累年甚被親禮 子彪字思

玄終於國子祭酒 惇字思俊孝友淳粹高節邁俗
彰之昆弟江左馳聲

江道字道載殷浩北伐請為詔議參軍 用褻雞以燒
賊營 後遷太常在職多所正諫 道載之正諫洋
洋盈耳

江灌字道羣舉秀才為治中別駕領晉陵太守遷御史
中丞性方正視權貴蔑如也不屈節於權臣 子績
字仲元為御史中丞奏劾無所屈撓

南史江夷字茂遠少自藻勵為後進之美 仕宋歷吏部尚書為吳郡太守後為右僕射 子湛字徽深仕宋轉吏部尚書餉饋盈門一無所受在選職公平無私不受請謁

江敷字叔文湛之孫為丹陽丞袁粲為尹嘆曰風流不墜政在江郎 仕齊為吏部郎轉都官尚書不為權倖降意 子蒨字彥標仕梁歷尚書吏部郎 蒨弟曇字彥德少學涉有器度位太子詹事 曇弟祿字

彥遐篤學有文章形貌短小神明俊發位錄事參軍
蒨子紆字會潔好莊老玄言尤善佛義 父卒墓

廬終日號慟不絕聲 紆子摠字摠持仕陳歷尚書

令

江智深夷之弟子愛好文雅辭采清贍遷尚書吏部郎
江秉之字玄叔祖道在宋為烏程令以善政著名東土
徵為建康令為政嚴察部下肅然後為山陰令人戶
三萬政事繁擾秉之御繁以簡常得無事 補新安

太守轉臨海並以簡約見稱在郡作一書案去官留
以付庫

江謐字令和秉之孫為于湖令強濟稱職仕齊以有才
幹遷掌吏部

江祐字弘業仕齊為中書令以外戚親要權冠當時

江淹字文通不事章句之學留情於文章起家南徐州
從事 升降承明之闕出入金華之殿 仕齊拜中

書侍郎王儉曰卿年三十五已為中書侍郎才學如

此何憂不至尚書金紫所謂富貴卿自取之 在尚
書非公事不妄行在官寬猛能折衷 為南司足以
振肅百寮明帝曰自宋以來不復有嚴明中丞君今
日可謂近世獨步 少以文章顯後夢郭璞問其取
筆乃探懷中五色筆以授之

江革字休映弱冠舉秀才為建康令為政明肅豪強憚
之行江州事以清嚴為屬城所憚 遷御史中丞彈
奏豪權一無所避 為度支尚書好獎進閭閻為後

生延譽衣冠士子翕然歸之 子德藻補新渝令政

尚恩惠頗有異績

江子一字元亮慷慨有大志為遂昌曲阿令皆著美績

文學江洪工屬文為建陽令

見吳均傳

孝義江柔之字叔遠孝悌通亮位至臺郎 又江軻字

伯倫以篤行知名

孝義江泌字士清母墓為野火所燒三日哭泣盡繼之

以血時有與泌同名者世謂泌為孝泌以別之

北史江式字法安祖瓊字孟琚晉馮翊太守善蟲篆父
紹興為秘書郎掌國史二十餘年以謹厚稱卒趙郡
太守式少傳家學篆體尤工 後歷著作郎

江悅之字彥和好兵書有將畧 梁初進號冠軍將軍

子文遙少有大度輕財好士拜咸陽太守勤於禮
接人所疾苦大盜猾吏無不知郡中震肅政為雍州
諸郡之最 為安州刺史善於綏納甚得物情

江夢孫字脩之九江湓城人諸生弟子不遠數郡而至

者百人春誦夏弦以時講聞鼓篋函文庠序常盈先
主輔政欲廣賢良之術聞其德業遂以幣帛聘之為
芸閣郎甚被親禮 後辭歸鄉里先主固留不止既
還家門生弟子復至乃率身耕稼躬事繼母旦則冠
帶入門溫清親饋飲饌退則更常服力操耒耜耨耘
暮而歸易衣侍膳畢然後就庠序集門生弟子說釋
經義如故時號為縉紳先生一門百口敦睦如一子
孫學業各授一經孝禮兼持江左稱之卒葬之日自

遠方至者幾千人而服纓絰徒跣者百許嗣主聞之
美其才茂德逸故贈國子司業優賜葬物

出江南
野史

宋朝江公望字民表睦州人也舉進士建中靖國元年
由太常博士除左司諫時御史中丞趙挺之與戶部
尚書王古等同治赦文挺之劾古傾天下之財以為
私惠者公望以謂上登極大赦欲與天下更始一切
蠲免豈容古以私意能傾天下之財上疏曰人君所
以知時政之利病人臣之忠邪無若諫官御史之為

可信也患聞知之不博也故聽以風聞雖事有不實
聞無不言至若挾情肆誣快私忿關上聽陛下不可
以不察也臣聞挺之與古論事每每不合屢見言氣
懷不平之心有待而發俚語有之官事私讎此小人
之所不為而挺之安為之豈忠臣乎公望諫諍有體
朝野稱為得人

江休復字鄰幾開封陳留人也與尹洙蘇舜欽遊舉進
士調藍田尉遷殿中丞召試充集賢校理通判廬州

知同州累遷刑部郎中修起居注休復善著書其為
文章淳雅尤長於詩善隸書喜琴奕飲酒與人交久
而益篤云

龐 五十二

姓纂曰周文王子畢公高之後封於龐鄉因氏焉

新序魏龐恭於太子質邯鄲謂魏王曰議臣過者三人
願王察之王曰寡人知之矣讒口果至遂不得見

後漢龐萌山陽人

龐參字仲達為漢陽太守郡人任崇有奇節參先候之
崇以薤一大本水一盂置戶屏前自抱兒孫伏於戶
下參思其意曰水者欲吾清也拔大本薤者欲吾擊
強宗也抱兒當戶欲吾開門恤孤也參在職果能抑
強助弱以惠正得民虞詡薦其有宰相器能後為太
尉錄尚書事

逸民龐公襄人居峴山之南未嘗入城府夫妻相敬如
賓劉表問曰先生苦居畝畝而不肯官祿何以遺子

孫平公曰世人皆遺之以危今獨遺之以安未為無所遺也遂攜妻子登鹿門山采藥不反

魏志龐德字令明每戰常陷陣却敵太祖聞其驍勇拜立義將軍常乘白馬關侯軍謂之白馬將軍後為

關侯所得罵侯曰寧為國家鬼不為賊將也謚策

曰惟侯戎昭果毅蹈難成名聲莅當時義高在昔

龐涓字子異以忠烈聞拜駙馬都尉遷西海太守

蜀志龐統字士元為南州士之冠冕守耒陽令在縣

不治免官魯肅曰龐士元非百里才也使處治中別
駕始當展其驥足先主以為治中從事

北史龐晃字元顯以良家子周文帝署為大都督領親
信兵常置左右 仕隋拜右衛將軍 為懷州刺史

唐龐堅京兆人歷潁川太守安祿山反南陽節度使魯
炆表堅為長史與賊將阿史那承慶相攻自正月盡
十一月不肯降

龐嚴字子肅壽州人第進士舉賢良方正第一太和五

年權京兆尹強幹不阿貴勢

龐師古曹州南華人也從梁太祖屢立戰功

事見五代史

宋朝龐籍字醇之單州城武人也舉進士累擢殿中侍御史慶歷四年召拜樞密副使籍請併省官屬徙兵就食於是邊費什省七八八年為參知政事明年以工部侍郎為樞密使籍言近世養兵務多而不精請與中書議簡汰之法仁宗疑焉籍曰儻有一夫之呼臣請以百口償之卒省兵八萬人皇祐三年拜同中

書門下平章事昭文館大學士 儂智高叛命狄青
為宣撫使或言青不可專任仁宗以問籍籍曰青起
行伍若以文臣副之則號令不專不如不遣也仁宗
然之及捷書至仁宗謂籍曰非卿執議豈能成功
籍卒謚莊敏籍曉法令長於吏事治民有惠愛特於
治軍甚嚴士卒聳畏之

逢 五十三

姓纂曰夏殷諸侯有逢公伯陵封齊土其後子孫氏

焉

左傳僖公六年許男見楚子面縛銜璧大夫衰絰楚子問諸逢伯對曰昔微子啟如是武王禮而命之使復其所楚子從之

成公二年齊師陳于鞌邴夏御齊侯逢丑父為右齊侯曰姑剪滅此而朝食不介馬而馳之

哀公元年逢滑當陳懷公曰臣聞國之興也以福其亡也以禍

後漢逢萌字子慶為亭長既而擲楯嘆曰大丈夫安能
為人役哉去之長安復解冠挂東都城門光武連徵
不起

雙五十四

顓頊之後封於雙蒙城因以為氏 天水狀云後魏
有涼州刺史疊水公雙士洛因家天水生彌周河州
刺史平涼公生瑒生士洛右武衛大將軍定相二州
總管杭州刺史呂國公生萬弘萬壽 東郡白馬縣

唐瀛呂二州刺史雙子符

邦 五十五

見姓苑

涇 五十六

見纂要文

郗 五十七

姓纂曰己姓青陽氏之後蘇忽生支子封郗邑因氏
焉

晉郝鑒字道徽高平金鄉人漢御史大夫慮之玄孫也
博覽經籍躬耕隴畝吟咏不倦以儒雅著名累遷太
子中書舍人元帝初為兗州刺史明帝即位王敦專
制拜安西將軍鎮合肥敦忌之表徵還與敦相見鑒
曰丈夫既潔身壯面豈可偷生屈節覲顏天壤耶敦
素懷無君之心聞鑒言大忿之拘不遣敦之黨與諧
毀日至鑒舉止自若初無懼心敦謂錢鳳曰郝道徽
儒雅之士名位既重何得害之乃放還臺遂與帝謀

滅敦既而錢鳳攻逼京都假鑿節加衛將軍都督從
駕諸軍事固辭不受軍號鑿曰羣逆縱逸其勢不可
當可以算屈難以力競百姓懲往年之暴皆人自為
守乘逆順之勢何往不克帝從之以尚書令領諸屯
營及鳳等平封高平侯帝以其有器望萬幾動靜輒
問之 假節鎮廣陵尋而帝崩鑿與王導等並受遺
詔輔少主進位車騎大將軍開府儀同三司及祖約
蘇峻反中書令庾亮宣太后口詔進鑿司空鑿奉詔

流涕設壇場大誓三軍鑿登壇慷慨三軍爭為用命
會峻死蘇逸等走吳興鑿遣李閔追斬之拜司空加
侍中更封南昌縣公以先爵封其子曇 卒謚文成

初鑿值永嘉喪亂在鄉里甚窮餒鄉人以鑿名德
傳共飴之時兄子邁外甥周翼並小常攜之就食鄉
人曰各自飢困以君賢欲共相濟耳恐不能兼有所
存鑿於是獨往食訖以飯著兩頬邊還吐與二兒後
並得存後邁位至護軍翼為剡縣令鑿二子惜曇

郝惜字方回少不交競弱冠除散騎侍郎不拜性至孝
居父母憂殆將滅性服闋襲爵南昌公徵拜中書侍
郎再遷黃門侍郎時吳守缺欲以惜為太守惜自以
資望少不宜超莅大郡朝議嘉之轉為臨海太守會
弟曇卒益無處世意在郡優游頗稱簡默謚文穆
三子超融冲超最知名

郝超字景興一字嘉賓少卓犖不羈有曠世文度交游
士林每在勝拔善談論義理精微悟好聚斂積錢數

千萬超好施一日中散與親故都盡其任心皆此類也桓溫辟為征西大將軍掾溫英氣高邁罕有所推與超言常謂不能測遂傾意禮待超亦深自結納時王珣為溫主簿亦為溫所重府中語曰髯參軍短主簿能令公喜能令公怒超髯珣短故也尋除散騎侍郎謝安與王坦之嘗詣溫論事溫令超帳中以聽之風動帳開安笑曰邾生可謂入幕之賓矣太和中溫有枋頭之敗尋有壽陽之捷超就溫宿中夜謂溫

曰明公都無所慮乎温曰卿欲有言耶超曰明公既居重任天下之責將歸於公矣若不能云云不足鎮壓四海震服宇內豈可不深思哉温深納其言 毋喪去職服闋除散騎常侍不起以為臨海太守加宣威將軍不拜卒凡超所交友皆一時秀美雖寒門後進亦援而有之及死之日貴賤操筆而為誄者四十餘人其為衆所宗貴如此

郝曇字重熙少賜爵東安縣開國伯朝論以曇名臣之

子每逼以憲制年三十始拜通直散騎侍郎遷中書
侍郎尋除尚書吏部郎拜御史中丞仍除比中郎將
都督徐兗青幽揚州領徐兗二州刺史假節鎮下邳
卒謚曰簡子恢嗣

郝恢字道胤少襲父爵散騎侍郎累遷給事黃門侍郎
領太子右衛恢身長八尺美鬚髯孝武深器之以為
有藩伯之望假節鎮襄陽恢甚得關隴之和降附者
動有千計以功進征虜將軍

郝隆字弘始襄亮有匪躬之節初為尚書郎轉左丞在朝為百寮所憚

唐郝士美字和夫兗州人父純舉進士拔萃制策皆高第張九齡李邕稱之自拾遺七遷至中書舍人處事不回為元載所忌遂還東都號伊川田父德宗召為學士不拜世高其節士美年十二通五經史記漢書皆能成誦父友蕭穎士顏真卿柳芳與相論繹曰吾曹異日當交二郝之間矣充昭義節度使

討王承宗最先有功憲宗喜曰固知士美能辦吾事
承宗懼會詔班師然威振兩河而生平與人交重然
諾以是名重於世

怡 五十八

姓纂曰本姓墨台孤竹君之後因避事改焉後魏有
怡寬遼西人生峯後周樂陵公生昂都公光清河公

北史怡峯字景阜遼西人本姓墨台 少以驍勇聞

翊戴周文進爵為伯拔迴洛復潼關 威名轉盛加

儀同三司 後拜夏州刺史 沈毅有膽畧得士卒
心當時號驍將

麋 五十九

姓纂曰楚大夫受封南郡麋亭因以為姓 東海朐
山漢有麋竺麋芳宋有麋勗之 又麋信撰說要注
穀梁

蜀志麋竺字子仲拜安漢將軍雍容敦雅而幹翮非所
長待之以上賓之禮未嘗有所統御 雍容風議見

禮於世 子威官至虎賁中郎將 威子照虎騎監
自竺至照皆便弓馬善射御

祈 六十

晉隱逸祈嘉字孔賓清貧好學 依學官誦書為書生
都養以自給 博通經傳精究大義教授門生百餘
人張重華徵為儒林祭酒依孝經作二九神經 天
錫謂為先生而不名之

皮 六十一

姓纂曰風俗通周卿士樊仲皮之後後漢有諫議大夫皮究 下邳後漢上計掾秦嘉集序皮仲固撰

晉有尚書郎皮湛

北史皮豹子漁陽人少有武畧 太武時拜使持節仇池鎮將有威信以前後戰功擢為內都大官 子懷喜復為仇池鎮將申布恩惠夷人大悅

皮景和善騎射初以親信事齊神武授通州刺史 趨捷有武用累遷尚書侍中 景和於武職中兼長史

事又性識平均故頻有美授 時詔獄多常令景和

按覆據理執正由是無枉濫 子信機悟有風神位

儀同三司於勲貴弟子中稱其識鑒 卒洮州刺史

皮日休唐之文士

未見傳

所著請韓文公配饗書桃花賦

九調七愛悼價諸篇見之文粹 通鑑廣明間黃巢

入長安以太常博士皮日休為翰林學士子光業晉

天福間為吳越王錢元瓘丞相

禪六十二

姓纂曰鄭大夫裨諶裨竈宣城姓苑云今宣州有裨氏

論語為命裨諶草創之

左傳襄公二十九年裨諶曰舉不踰等則位班也擇善而舉則世隆也 諶能謀事

裨竈好言災異子產曰竈焉知天道

施 六十三

姓纂曰魯惠公子施父尾生施伯伯孫傾叔生孝叔

惠公五代孫也因氏焉漢有博士讐

左傳桓公九年曹太子朝賓之以上卿初獻樂奏而嘆
施父曰太子其有憂乎非嘆所也

成公十一年聲伯以其外弟為大而嫁其外妹放施孝
叔

前漢儒林施讐字長卿沛人從田王孫受易梁丘賀薦
之拜為博士與五經諸儒雜論同異於石渠閣

南史恩倖施文慶陳後主以為中書舍人 明閑吏職

心算口占應時條理大被親幸

猗 六十四

姓纂曰史記云猗頓魯富人河東猗頓自魯居之

又史記猗頓用鹽起與王者埒富

揚子學行篇猗頓之富以為孝不亦至乎

孔叢曰猗頓魯之窮士聞朱公富往而問術焉公曰子

欲速富當畜五特乃適西河大畜牛羊於猗氏之南

十年之間其息不可計貲擬王公馳名天下

睦 六十五

姓纂曰趙大夫食采於睦邑因以為氏 趙郡邯鄲

為郡著姓漢有符節令睦弘字孟

前漢睦弘字孟魯國蕃人也少時好俠鬪雞走狗長乃

變節從瀛公受春秋以明經為議郎至符節令 推

春秋之意以辨立石起柳之異

北史隱逸睦夸少有大度不拘小節耽好書傳不以世

務經心浩然物表高尚不仕寄情丘壑 或謂夸曰

吾聞有大才者必居貴仕子何獨在桑榆乎乃著知
命論以釋之

支 六十六

姓苑云人姓琅琊姓苑云今琅琊有支氏 西域石

趙司空支雄傳云其先月支胡人也晉有高僧支道
字道林天竺人

唐支叔才定州人隋末荒饑母為賊執叔才告以情賊
憫其孝為解母病癰叔才吮瘡注藥及亡廬墓有白

鵲止其傍高宗表異其家

綦六十七

姓苑云義興人河南官氏志綦連氏改為綦

北史綦儁字擲顯孝莊時為滄州刺史甚為吏人畏悅
後兼吏部尚書佞巧能候當途 子洪實字巨正
位尚書左右郎嗜酒好色無行檢

綦連猛字武兒少有志氣便弓馬 齊神武時以軍功
封廣興縣侯 梁使來聘求角武藝遣猛接之梁人

引弓兩張皆三石猛併取四張疊輓之過度梁人嗟服出為定州刺史寬惠清慎吏人稱之

箕 六十八

姓纂曰箕子殷畿內同姓諸侯也左傳晉大夫箕鄭箕遺漢有西華令箕堪

新序魏文侯曰吾一見箕季而得四馬教我無奪農時也無侵封疆也下無侵上也無多斂於百姓也

尚書洪範惟十有三祀王訪于箕子

祁六十九

姓纂曰帝堯伊祁氏之後左傳晉大夫祁奚生午午
生盈生勝姓苑云今扶風有此姓唐刑部員外郎祁
順之樂陵祁順之後代居滄州

六一先生為祁衛尉墓碑惟太原祁氏其先黃帝之
子二十五人一食於祁遂為氏太原晉公盛於春秋
之際祁氏亦盛於晉其後世遠而衰子孫亡散之他
國有居譙者即為譙人

左傳襄公三年君子謂祁奚能舉善矣稱其讎不為諂
立其子不為比舉其偏不為黨

襄公十六年晉平公即位祁奚為公族大夫改服修官
烝于曲沃

奚子祁午奚曰擇子莫若父

公羊傳宣公六年趙盾之車右祁彌明者國之力士也
佗然從乎趙盾而入

說苑祁射子見秦惠王王說之於是唐姑讒之復見惠

王懷怒以待之非其說異也所聽者異也

晉隱逸祈嘉見前祈姓

名賢氏族言行類稿卷三

欽定四庫全書

名賢氏族言行類稿卷四

宋 章定 撰

韋 七十

姓纂曰出自顓頊大彭之後夏封於豕韋苗裔以國
為姓家彭城

前漢韋賢字長孺魯國鄒人其先韋孟為楚元王傅
賢篤志於學通禮尚書以詩教授號稱鄒魯大儒徵

為博士給事中進授昭帝詩宣帝以先帝師甚見尊
重為丞相封扶陽侯為相五歲罷歸賜第一區丞
相致仕自賢始八十二薨謚節侯賢四子長方山次
弘次舜少子玄成復以明經至丞相諺曰遺子黃金
滿籬不如教子一經玄成字少翁以父任為郎謙
遜下士其接人貧賤者益加敬以明經擢為諫大夫
元帝時為丞相繼父相位封侯故國榮當世焉
玄成為相七年守正持重不及父賢而文采過之

後漢韋彪字孟達孝行純至雅稱儒宗 舉孝廉除郎

中三輔諸儒莫不仰慕之 顯宗召拜謁者賜車馬

衣服數陳政術每歸寬厚 拜大鴻臚 彪族子義

字季節為甘陵陳二縣令政甚有績官曹無事牢獄

空虛順帝時上書譏切左右久抑不遷

吳志韋曜字弘嗣吳郡人少好學能屬文遷太子中庶

子又為太史令撰吳書篤學好古博見羣籍有紀述

之才

晉忠義韋忠字子節少慷慨有不可奪之志 惟不虛

諾長大必為佳器 十二喪父哀慕毀悴杖而後起

後仕劉聰為平羌校尉討叛羌矢盡不屈節而死

儒林韋謏字憲道雅好儒學羣言秘要之義無不綜覽

後仕石季龍歷守七郡咸以清化著名 前後四

登九列六在尚書三為侍中再為太子太傅 好直

諫陳軍國之宜多見允納

南史韋叡又字懷文世為三輔著姓 事繼母以孝聞

仕梁為豫州刺史又都督諸軍侵魏大破之所獲與
熊耳山等為梁世名將兄纂闡並早知名纂
仕齊位司空記室闡為建寧縣所得俸百餘萬悉
委伯父處分叡子放字元直位竟陵太守在郡和
理為吏人所稱子掣字長倩戰死於侯景簡文流
涕曰社稷所寄唯在韋公如何不幸先死行陣放
弟黯字務直位太府卿

北史韋閻字友觀世為三輔冠族少有器望太武初

拜咸陽太守 子範試守華山郡 範子雋字穎超

事祖母以孝聞 溫和謙讓為州里所稱 歷位都水使

者 子子掣字暉茂 兄弟十三人 並以孝行 父葬廬

墓負土成坟 弟榮亮字子昱 德行仁孝為時所重

歷諫議大夫 子綱字世紀 有操行才學 見稱領袖

閔從子崇字洪基 除潁川太守 不好發摘細事 恒

云何用小察以傷大道 郡中大安 孝文聞而嘉賞 賜

帛二百匹 為河南邑中正 頻居衡品 以平直見稱

出為鄉郡太守更滿吏人詣闕乞留復延三年

韋叔裕字孝寬除浙陽郡守時獨孤信為新野郡守政

術俱美吏人號為連璧轉晉州刺史移鎮玉璧齊

神武攻之欲令其降孝寬報云孝寬關西男子必不

為降將軍也魏文帝嘉其功授驃騎大將軍為雍

州刺史勒部內於路側植槐樹行旅得庇蔭文於

是令諸州夾道皆種樹在邊多載屢抗強敵雖

在軍中篤意文史兄夔字敬遠志尚夷簡澹於榮

利時號為居士明帝厚禮敬之號曰逍遙公 子世
康隋文帝授為絳州刺史以雅望鎮之闔境清肅不
以得喪干懷在州有止足之稱 在任有惠政奏課
進最擢為禮部尚書轉吏部尚書選用平允請託不
行後乞骸骨上曰冀與公共理天下縱筋力衰謝猶
屈公卧臨一隅乃拜荊州總管

韋瑱字世珍幼聰敏有夙成之望 魏時為行臺左丞
明察有幹局再居左轄時論榮之 除瓜州刺史雅

性清儉蕃夷贈遺一無所受胡人畏威不敢為寇秩滿還京老幼遮送留連十數日方得出境明帝嘉之授儀同三司子師字公穎讀孝經捨書而嘆曰名教之極其在茲乎州里稱其孝行武帝平陳領元帥掾陳國府藏悉委之秋毫無犯稱為清白

韋祐字法保魏時除河南尹加驃騎大將軍

唐韋挺京兆人少與隱太子善高祖平京師累遷太子左衛驃騎貞觀初王珪數薦之拜御史大夫上

討遼東曰卿為朕圖之帝親解貂裘及中廐馬賜之
即詔河北列皆取挺節度 子待價

韋武待價曾孫以廕補 後為絳州刺史鑿汾水灌田
萬三千頃墾書勉勞

韋弘機京兆人貞觀時使西突厥冊拜同俄設為可汗
會石國叛道梗三年不得歸裂裾錄所過諸國風俗
物產為西征記太宗問外國事即上其書帝大悅

顯慶中為檀州刺史以邊人陋僻不知文儒貴乃修

學宮畫孔子七十二子漢晉名儒像自為贊勸生徒
由是大化 擢司農少卿任司農十年省惜常費積

三十萬緡

韋雲起京兆人隋開皇中以明經補符璽直長奏事文
帝前帝曰外事不便可言之時柳述侍雲起即奏述
豪侈帝顧述曰雲起言而藥石也可師之

韋思謙名仁約鄂州人及進士第擢監察御史常曰御
史出使不能動搖山嶽震懼州縣為不任職 褚遂

良市地不如直思謙劾之復相出思謙清水令或弔之答曰吾狷直觸機輒發何暇恤身乎丈夫當取言地要須明目張膽以報天子焉能碌碌保妻子邪

皇甫公義引為倉曹參軍謂曰公非池中物屈公為數旬客以重吾府改侍御史高宗賢之召與語雖倦猶數刻罷累遷尚書左丞振明綱轄朝廷肅然

進御史大夫性褻諤顏色莊重不可犯見王公未嘗屈禮或譏之答曰耳目官固當特立鵬鷺鷹鸇豈衆

禽之偶奈何屈以狎之

韋承慶字延休擢進士第遷司議郎儀鳳中詔太子監國太子稍嗜聲色承慶上疏極諫又進諭善箴太子嘉納張易之誅承慶以素附離免冠待罪時議草赦令咸推承慶召使為之無撓色設辭援筆而就衆嘆其壯

韋嗣立與承慶異母第進士承慶解鳳閣舍人武后召嗣立謂曰爾父嘗稱二子忠孝比兄稱職如父言今

使御兄弟自相代即拜鳳閣舍人 長安中時州縣
非其人李嶠等曰今朝廷重內輕外每除牧守皆訴
不行請選臺閣賢者分典大州后曰誰為朕行嗣立
曰請先行以示羣臣后悅由是楊再思等八十人悉
補外 景龍中拜兵部尚書 封道遙公 初嗣立
代承慶為鳳閣舍人承慶亦代為天官侍郎及知政
事父子並為宰相世罕其比子濟

韋濟開元初調郵城令或言吏部選縣令非其人既衆

謝有詔問所以安人者對凡二百人惟濟第一四選
戶部侍郎為太原尹 天寶中授尚書左丞凡三世
居之

韋弘景嗣立孫擢進士第遷吏部侍郎銓綜平序貴幸
憚其嚴不敢恩以私拜尚書左丞駁正吏銓所除六
十餘官郎吏肅然望風修整楊虞卿以累下吏詔弘
景與御史詳讞虞卿私造門弘景厲言曰有詔按公
尚私謁邪以直道進議論持正有守當時風教所倚

賴為長慶間名卿

韋湊字彥宗京兆人祖叔諧貞觀中為庫部郎中與弟吏部郎中叔謙兄主爵郎中季武同省時號三列宿

姚崇嘗曰韋子識遠文詳吾恨晚得之

韋見素字會微及進士第遷文部侍郎 祿山表請蕃將三十二人代漢將帝許之見素謂國忠曰祿山以蕃代漢難將作矣國忠不應見素曰知禍之芽不先防見禍之行不能制焉用彼相明日當懇論之未幾

祿山果反十月丙申有星犯昴見素言於帝曰昴者胡也天道謫見所應在人祿山將死矣已而果驗

韋諤歷京兆府司錄參軍以陳元禮之變擢御史中丞
韋維字文紀進士對策高第徙內江令教民耕桑縣為
刻頌 遷戶部郎中與宋之問稱戶部二妙云 弟
繩長文辭舉孝廉以母老不肯仕踰二十年乃歷長
安尉威行京師

韋虛心字無逸維之子也舉孝廉遷大理丞据正不撓

為工部尚書 弟虛舟為刑部侍郎初維為郎時柳
於廷及虛心兄弟居郎省對之輒斂容 自叔謙後
至郎中者數人世號郎官家

韋安石京兆人舉明經雍州長史蘇良嗣器之謂曰大
才當大用徒勞州縣可乎薦擢并州司馬有善政

拜德鄭二州刺史政尚清嚴 時二張及武三思寵
橫安石數折辱之陸元方告人曰韋公真宰相

韋陟字殷卿與弟斌俱秀敏異常童安石晚有子愛之

為中書令陟甫十歲授溫王府東閣祭酒風格方整
善文辭書有楷法一時知名士皆與游 開元中居
喪杜門不出八年親友更往敦曉調洛陽令宋璟嘆
曰盛德遺範盡在是矣 遷禮部侍郎於鑒裁尤長
故事取人以一日試為高下陟許自通所工先就其能
試之乃以程考由是無遺才 遷吏部侍郎 常以
五采牋為書記使侍妾主之陟唯署名自謂所書陟
字若五朶雲時人慕之號郇公五雲體家法修整敕

子允就學夜分見其勤旦日其色必怡稍怠則不與之語

韋紹開元時遷太常唐興禮文雖具然制度繆缺不倫
紹議加籩豆之禮

韋述弘機曾孫家厨書二千卷述為兒時誦憶畧徧元
行冲異之試與語前世事熟復詳諦如指掌然屬文
受紙輒就行冲曰外家之寶也舉進士考功郎宋之
問曰童子何業述曰性嗜書所撰唐春秋三十篇恨

未畢它唯命之問曰本求茂才乃得遷固遂上第

好譜學見柳冲所撰姓族系錄每私寫懷之還舍於
百氏源派為詳更撰開元譜二十篇 張說薦為直

學士從封太山奏東封記有詔褒美 詔修六典

初令狐德棻吳兢等撰武德以來國史皆不能成述

因二家參以後事遂分紀傳又為例一篇文約事詳

蕭穎士以為譙周陳壽之流 典圖書四十年任史

官二十年澹榮利為人純厚當世推之安祿山亂述

獨抱國史藏南山 弟道迪學業亞述與道對為學
士與迪並為禮官縉紳高之時趙冬曦兄弟亦有名
張說謂人曰韋趙兄弟人之杞梓

韋堅京兆人運江淮租賦所在置吏督察以佐國廩玄
宗咨其才 鑿潭以通漕名曰廣運

韋處厚字德載京兆人進士第又擢才識兼茂科舉賢
良方正異等憲宗初擢左補闕帝曰韋處厚數上疏
其言忠切 穆宗立為翰林侍講學士進兵部侍郎

天子荒暗月視朝才三四處厚入見即自陳有罪願
死帝感悟王廷湊之亂帝嘆宰相不才處厚曰陛下
有一裴度不能用乃當饋而嘆此馮唐所謂帝有頗
牧不能用也 姿狀如甚懦者居家亦循易至廷爭
嶷然不可回奪百僚畏惕未嘗及以私 性嗜學家
書讐正至萬卷

韋倫系本京兆居家以孝慈稱

韋臯字城武京兆人諸帥府更辟擢監察御史知隴州

行營田事德宗狩奉天朱泚叛泚遣使以御史中丞授臯臯迎勞受泚詔明日置酒大會使至臯伏甲殺之泚復使他使至臯亦斬之帝聞乃授臯隴州刺史

貞元初代張延賞為劍南西川節度使招徠雲南破吐蕃進封南康郡王帝製紀功碑褒賜之 治蜀

二十年凡破吐蕃等功烈為西南劇善拊士至雖婚嫁皆厚資之 始李白為蜀道難篇以斥嚴武陸暢更為蜀道易以美臯焉臯歿蜀人德之見其像必拜

凡刻石著臯名皆鏡其文尊諱之 臯弟平

韋正貫字公理平之子也少孤臯謂能大其門號曰臧
孫舉賢良方正異等又中詳閑吏治科進壽州團練
使宣宗立以治當最拜京兆尹 擢嶺南節度使無
所取吏咨其清

韋綬字子章京兆人喪父鏡血寫浮屠書

韋夏卿字雲客京兆人大歷中與弟正卿同舉賢良方
正皆策高等時仍歲旱蝗詔以郎官宰畿甸授奉天

令課第一 為吏部侍郎時從弟執誼在翰林嘗受人金有所干請密以金內夏卿懷中夏卿毀懷不受曰吾與汝賴先人遺德致位及此顧當是哉執誼大慚 晚歲歸署其居曰天隱洞為政務通簡所辟士如路隋張賈李景儉等至宰相達官故世稱知人

韋渠牟京兆人少警悟工為詩李白異之 德宗誕日詔佛老並對質問大趣渠牟有口辨答問鋒生帝聽之意動是歲中至諫議大夫抵延英大臣率漏下二

三刻渠年每奏輒五六刻乃罷

韋執誼京兆舊族及進士第對策異等年踰冠入翰林
為學士出入備顧問

韋貫之名純父肇大厯中為中書舍人貫之及進士第
擢賢良方正異等補渭南尉 河中鄭元邠士美以

厚幣召皆不應 遷長安丞或薦之京兆尹李實舉
笏示所記曰此其姓名也或者喜以告子今日詣實
而明日賀者至矣貫之不往官亦不遷 為監察御

史舉弟纁代議者不謂之私 遷禮部員外郎 所
取士抑浮華先行實 俄同平章事克蔡皆如貫之
策 沈厚寡言居相嚴身律下以正議裁物生平不
通饋遺故家無羨財

韋澳字子裴貫之子第進士擢宏辭方靜寡欲十年不
肯調高元裕欲薦之諷澳謁已澳曰然恐無呈身御
史周墀表署幕府 進學士承旨為宣宗禮遇召問
政得失改京兆尹帝舅鄭光主墅吏豪肆積年不輸

官賦澳逮繫之帝曰可貸之乎答曰安可使法獨行
於貧下乎帝入白太后為輸租乃免豪右斂跡 澳
在河陽累年宣宗遣使至魏博道出澳 以薄紙手
作詔賜澳將以為相 為學士時帝嘗曰朕每遣方
鎮刺史欲恚州郡風俗者卿為朕撰一書澳乃取十
道四方志手加紬次題為處分語

韋綬貫之兄舉孝廉貢進士擢明經為翰林學士帝嘗
幸其院妃從之時大寒綬方寢以妃蜀襖袍覆而去

其待遇如此

韋溫字弘育，綬之子。七歲日誦書數千言。十一舉兩經及第，以拔萃高等入為監察御史，以臺制苛嚴，不可。以省養不拜侍親疾，調湯劑二十年，衣不弛帶，居喪毀瘠。遷右補闕，宰相宋申錫被搆罪，不測。溫倡曰：丞相操履有初，乃姦人陷之。吾等豈避雷霆使上蒙咎耶？率同舍伏閣切爭，由是知名。帝重溫，出為陝虢觀察使，民當輸租而麥未熟，吏白督之。溫曰：使民

貨田中穗以供賦可乎緩期而賦辦 性剛峻人望
見無敢戲慢者 號山林友

韋表微字子明羈州能文裴况嘗謂表微似衛玠 擢
進士第授監察御史裏行不樂曰爵祿譬滋味也人
皆欲之吾年五十冒游少年間取一班一級不見其
味將為松菊主人 為翰林學士學士缺表微薦處
厚人服其公篤故舊尤好春秋著三傳總例著九經

師授譜

韋博字大業京兆人取進士第

韋琮字禮玉世顯仕進士及第

韋昭度字正紀京兆人擢進士第 踐歷華近累遷中

書舍人

韋仁壽京兆人隋大業末為蜀郡司法得罪者自以韋君所論死無恨

韋景駿弘機孫中明經歷肥鄉縣令北瀕漳連年泛溢人苦之高築漳水至堤有教導及去人立石著功後

為貴鄉令有母子相訟者曰教之不孚令之罪也傳授孝經母子感悟請自新治有名後為趙州長史道出肥鄉民爭奉酒食迎犒再遷房州刺史治民求所以便之後至御史中丞

韋丹字文明京兆人擢明經為容州刺史教民耕興學校屯田二十四所仁化大行徙江南西道觀察使計口受俸民不知為瓦教民為陶為陂塘五百九十
八所灌田萬二千頃宣宗讀元和實錄見丹政事

卓然它日與宰相語元和時治民孰第一周墀對丹
有大功德歿四十年老幼思之不忘乃詔上丹功狀
命刻於碑

子宙為永州刺史州方災歉及俗不知法每飢人輒
葺死宙處治之皆有利

韋彤京兆人四世從祖方質為武后時宰相彤名治禮
德宗時為太常博士

韋公肅隋儀同觀城公約七世孫元和初為太常博士

韋應物少以三衛郎事玄宗豪縱不羈玄宗崩始折節
務讀書然余觀其為人性高潔鮮食寡慾所居掃地
焚香而坐與豪縱者不類其詩清深妙麗雖唐詩人
之盛亦少其比劉禹錫太和六年十二月九日有舉
韋中丞自代一狀而唐書文藝傳乃云史家逸其行
事故弗得而述云見韓子蒼詩話

五代韋震字東卿雍州萬年人也為人彊敏有口辨事
梁太祖為都統判官

時七十一

姓纂曰齊有賢人時子著書見孟子 新論有時農

鉅鹿魏有壽春令時苗後趙有謁者僕射時軌姓

苑云並鉅鹿人也

五代時溥徐州人為州牙將黃巢亂京師節度使支詳

遣溥與陳蕃率兵五千西討至萊蕪大破之諸將皆

有功惟溥功第一加檢校司徒同中書門下平章事

進檢校太尉兼中書令鉅鹿郡王

師七十二

姓纂曰風俗通師樂人瞽者之稱晉有師曠魯有師乙晉有師佺師觸師蠲也又師服晉大夫也

左傳僖公七年管仲曰鄭有叔詹堵叔師叔三良為政未可間也

僖公二十二年晉勞楚子于柯澤楚使師緡示之俘馘襄公二十四年舒鳩人叛楚楚子使師祁犁沈尹壽讓之

襄公三十年絳人曰臣生之年正月甲子朔四百有四
十五甲子矣其季於今三之一也師曠曰魯叔仲惠伯會
卻成子于承匡之歲也七十有三年矣魯使者在晉
歸語諸武子曰晉未可媮也有史趙師曠而咨度焉

曠字子野晉樂師也驟歌北風又歌南風石言于
晉晉侯問師曠曰石何故言對曰石不能言民聽濫
也叔向曰子野之言君子哉

前漢師丹字仲公琅瑯東武人治詩舉孝廉為郎徵

為光祿大夫後為太子太傅徙為大司空 經為世
儒宗德為國黃者可謂社稷之臣

貸殖師史轉穀百數賈郡國無所不至過邑不入門能
致十千萬

南史孝義師覺授撰孝子傳八卷

伊 七十三

姓纂曰帝堯伊祁氏之胤裔孫伊尹名摯相湯生陟
之風俗通漢有議郎伊推又伊嘉為雁門都尉石顯

黨 山陽蜀志伊籍山陽人也今在僕射安黃節度
伊慎廣州人 河南官氏志伊婁改為伊後魏有伊

猷代人

尚書伊尹作咸有一德惟伊躬暨湯咸有一德克享天
心受天明命君奭在昔成湯時則有若伊尹格于皇
天

伊陟相太戊亳有祥桑穀共生于朝伊陟贊于巫咸作

咸乂四篇

伊陟伊尹子

蜀志伊籍字機伯為左將軍從事中郎 使於吳孫權
聞其才辯欲逆折之適入拜權曰勞事無道之君乎
即對曰一拜一起未足為勞其機捷類如此 遷昭
文將軍雍容風議見禮於世

北史伊馱代人少勇健善射走及飛鳥曳牛却行擢為
侍郎 太武曰馱智力如此終至公相 後拜司空
清約自守為政舉大綱不為苛碎 孫益生驍勇有
膽氣累有戰功遂為名將

枝七十四

楚大夫枝如子躬之後或姓枝如氏

儀七十五

衛大夫儀封人見論語徐大夫儀楚西河漢有儀長孺

隨七十六

周同姓國也又杜伯魯孫晉大夫食采於隨亦曰隨會

漢有博士隨何又有右扶風隨蕃

姬七十七

帝嚳生姬水因以為氏裔孫周文王三十餘代至赧王
子孫號姬氏漢有周子南君姬嘉唐水部郎中處遜
代居長安開元初以玄宗嫌名改姓周氏

媯七十八

世本云帝舜之後舜生媯汭子孫氏焉後漢有媯鵠後
改為姚氏文士傳有媯覽

岐七十九

風俗傳岐伯黃帝師 安化唐萬福府統軍岐才慶州

人

離八十

風俗通云離婁孟子門人漢有中庶子離常之 後漢

有離班

驪八十一

左傳驪戎國之後在昭應縣

危八十二

見姓苑

奇 八十三

伯奇之後以王父字為氏 河南後魏官氏志奇斤氏

改為奇

為 八十四

魯昭公子公為之後 後漢南郡太守為昆

義 八十五

義和堯掌天地之官子孫氏焉

戲 八十六

伏戲之後子孫氏焉

兒八十七

吳郡有語兒生而能語子孫氏焉 河南官氏志賀兒

氏改為兒氏

訾八十八

風俗通席譽妃訾媼氏女姓苑云今齊人漢功臣表有

櫻虛侯訾順

宜八十九

隋西南夷有宜繒宜林

卑
九十

卑耳國之人後或云鮮卑種類 漢有右北平太守卑
躬河間卑躬河間人鴈門後漢太尉掾卑整 又魏
志公孫度將有卑術

彌
九十一

史記衛公孫彌牟彌牟孫子瑕以王父字為氏 新豐
三輔決錄漢彌氏新豐人

馳 九十二

見姓苑

蚩 九十三

蚩尤氏之後以國姓

斯 九十四

姓苑云吳人 吳志剡縣史斯從 東陽南齊書東陽

郡有斯氏

移 九十五

漢有弘農太守移良

蘄 九十六

姓苑云蘄春侯之後蘄如

旗 九十七

風俗通齊卿公孫竈惠公孫也生樂施字子旗子孫以

王父字為氏後漢有旗流甘

其 九十八

漢功臣表陽河侯其石傳封六代

期 九十九

風俗通楚大夫居期思城因以為姓

慈 一百

高陽氏才子之後美其宣慈惠和因以為姓急就章有

慈仁

釐 百一

後秦錄有釐豔

釐 百二

左傳宋有郟班 漢功臣表芒侯郟跖跖子昭昭子甲

尚景帝女南宮公主

僖

百三

姓苑云魯僖公之後今彭城人

狸

百四

左傳八元季狸之後

脂

百五

見姓苑京兆魏志中散大夫脂習哭孔融者

夔 百六

芊姓楚君熊摯之後為夔子孫以國為氏石趙有太保夔安本天竺人遼東夔安寓居遼東玄孫逸姚秦司空後燕有遼東夔騰

菑 百七

見姓苑 北海孔融集菑壯青州人

遺 百八

魯費宰南遺之後急就章有遺人

資 百九

黃帝之後食采益州資中因以為氏 陳留風俗通資

成陳留人也

者 百十

伊祁氏之後亦作祁

之 百十一

姓苑有之氏

台

音夷
百十二

見姓苑亦墨台之後或云駘氏之後

夷

百十三

齊大夫夷仲年之後論語逸民夷逸

司

百十四

左傳鄭有司臣司齊

遲

百十五

殷賢人遲任 尚書盤庚上遲任有言曰人惟求舊器

非求舊惟新 晉有遲超

治 百十六

人姓見纂要

茲 百十七

左傳魯桓公孫公孫茲之後以王父名為姓其後有茲

無還

丕 百十八

左傳晉大夫丕鄭丕豹

邳 百十九

風俗通云奚仲為夏車正自薛封邳其後以為氏焉後

漢二十八將有衛尉信都邳彤

騶百二十

左傳晉七輿大夫騶欵鄧有騶甥

尸百二十一

漢書云尸佼晉人商君師著尸子風俗通云其先封於

尸鄉故為尸氏齊相有尸臣

茨百二十二

後漢有桂陽太守茨充

纍百二十三

風俗通纍祖之後晉七輿大夫纍彪

飢百二十四

左傳殷人七族有飢氏

荔百二十五

蜀有刁達避難改焉

藜百二十六

姓苑云淮南人

池 百二十七

以居為姓也漢有中牟令池瑗魏有城門侯池仲魚義

安今義安有池氏

為 百二十八

為賈字伯羸楚司馬也賈為工正官名孫叔敖楚令尹為

艾獵也父賈 為子馮孫叔敖從子也為楚令尹

知 百二十九

知武子晉卿也名瑩字子羽 荀盈字伯夙知瑩之子
是曰知悼子荀氏知林父曰中行氏弟首曰知氏

名賢氏族言行類稿卷四